

四庫全書

子部

欽定四庫全書

羣書考索後集卷二十

宋 章如愚 編

官制門

武階類

宋朝沿唐舊制武選之稱自內客省使至閤門使使各有副為橫行自皇城使至供備庫使為諸司正使自皇城副使供備庫副使為諸司副使自內殿承制至三班

借使為使臣元豐肇正文階而武階猶未及改

元豐董正官制如武臣易將軍校尉之號竟獨依舊

不復更定

史

政和初一切易以新名正使為大夫副使為郎橫行十二階正副亦然是有郎居大夫之上者其後以新名未足又增置宣正履正叶忠翊衛親衛大夫郎通為橫行

政和六年御筆官爵以待勞能今興事造功能者輩

出而官名未及何以寵獎多士可增下項右武左武
拱衛親衛翊衛中衛中亮中侍協忠履正宣正正侍
大夫通舊依此郎亦如之唯不置通侍

紹興雜壓釐正其序郎皆在大夫之下

聖朝
職畧

太尉

見使
相門

橫行十三階

通侍大夫

舊為內
客省使

政和新制宋朝內客省使未嘗除人

自易武階詔不置通侍蓋遵祖宗之意也

正侍大夫

舊為延福宮使

政和新制

宣政大夫政和初易武階未有宣政大夫續增置焉

履正大夫政和續增置

協忠大夫政和續增置

忠侍大夫

舊為景福殿使

政和新制以景福殿使為之

忠亮大夫

舊為客省使

政和新制

中衛大夫

舊為引進使

政和新制

翊衛大夫政和續添置

親衛大夫政和續增置

拱衛大夫

舊為四方館使

政和新增

左武大夫

舊為東上閤門使

政和新制

右武大夫

舊為西上閤門使

政和新制

舊諸司使八階

武功大夫

舊為皇城使

政和新制

武德大夫

舊為宮苑左右驥內藏庫使

政和新制

武顯大夫

舊為左藏庫東西作場使

武節大夫

舊為莊宅六
宅文思使

政和新制

武畧大夫

舊為內園洛苑
如京崇義使

政和新制

武經大夫

舊為西京
左藏庫使

政和新制

武義大夫

舊為西京作坊使東
西染院使禮賓使

政和新制

武翼大夫

舊為供
備庫使

舊橫行副使

正侍郎舊在右武大夫之下右武郎舊

在武功大夫之上紹興始釐正焉

十二階

正侍郎宣正郎履政郎協忠郎中侍郎政和續增置

中亮郎

舊為客省副使

政和新制

中衛郎

舊引進副使

政和新制

翊衛郎親衛郎政和續增置

拱衛郎政和新制以四方館使為拱衛大夫而四方館

舊無副使續置拱衛郎

左武郎

舊為東閣門使

政和新制

右武郎

舊為西閤門使

政和新制

舊諸司副使八階

武功郎

舊為皇城副使

政和新制

武德郎

舊為宮苑使左右驎副使內藏庫副使

政和新制

武顯郎

舊為左藏庫副使東作坊副使

政和新制

武節郎

舊為莊宅副使六宅副使文思副使

政和新制

武畧郎

舊為內園副使洛苑副使如京副使崇儀副使

政和新制

武經郎

舊為西京藏庫副使

政和新制

武義郎

舊為西京作坊副使東

政和新制

武翼郎

舊為供備庫副使

政和新制

小使臣十二階

訓武郎舊為內殿承制

修武郎舊為內殿崇班

從義郎舊為東頭供奉官

秉義郎舊為西頭供奉官

忠訓郎舊為左侍禁

忠翊郎舊為右侍禁

成忠郎舊為左班殿直

保義郎舊為右班殿直

承節郎舊為三班奉職

承信郎舊為三班借職

進武校尉舊為三班差使 進義校尉舊為三班差使
政和新制

太史局

太史令三代各有太史秦有太史令胡毋敬秦漢以來
太史之任兼成周太史馮相保章三職通典漢司馬談父

子相繼為太史令遷云文史星厯近乎卜祝至宣帝時

修撰之職以他官領之

此語見通典中書令史官門

於是太史之官

唯知占候而已

已上合史通通典六典之詞

又史通曰自古太史之職雖有著述為宗而兼掌歷象日月陰陽氣數司馬遷既沒後之續史記者褚先生劉向馮商揚雄之徒並以別職來知史務於是太史之署非復記言之司故張衡單暉王立高堂隆等其當官見稱唯知占候而已

故後漢百官志曰太史令掌天時星歷而不及史掌晉太史令品第七江左以他官兼領

六典注云高瑩以侍中陳卓以義興守吳道欣以殿

中侍御史兼領

宋齊梁陳同隋祕書省太史曹置令二人煬帝改曹為
監唐因之武德改為太史局龍朔改祕書閣局光宅改
渾天監又曰渾儀監長安復曰太史局景龍曰太史監
景雲又為局六典掌察天文稽厯數凡日月星辰風雲氣
色之異率其屬而占每季錄祥眚送門下中書省紀于
起居注歲終上送史館歲頒厯于天下唐百官志○宋朝因
梁曰司天監或以他官兼判又有同判之名以朝官充

兩朝國史志云監及少監闕則置判監事二人以五
官正以上充與分紀同

掌察天文祥異鐘鼓刻漏稽定厯數供諸壇祭祀神位
版畫日

兩朝志

元豐官制行改為太史局有令有判局有

同判局選五官正以上業優考深者二人為判及同判
掌占天文及風雲氣候凡祥異之事自具所占以聞歲
一頒厯則造進御覽祭祀婚冠喪葬則擇所用日政和
因仍無所改其別局有天文院鍾鼓院測驗渾儀刻漏

所印歷所皆主占驗歷法

續會要

太史正國初司天監無正元豐官制行太史局置正太史令總一局之事而正與丞為之貳

五官正唐乾元三年置春官夏官中官秋官冬官正各一人掌司四時各司其方之變異

唐職官志

宋朝設五官

正至道中詔五官正磨勘至殿中丞止以後只加檢校官元豐無改所掌與唐同

太史丞漢太史有丞一人秩二百石魏晉宋齊皆同

六典

注隋置二人煬帝減一人唐初不置久視改渾儀監
始置丞二人長安省景龍復置六宋初司天監有丞
元豐官制行置太史局丞續會要太史令總一局之事
而丞為之貳

太史局直長宋初司天監無直長元豐改太史局有直
長自直長至今十年一遷續會要元祐官品直長從八

品

靈臺郎後漢太史下別有靈臺丞掌靈臺云云掌候日

月星辰

後漢百官志

魏太史有靈臺丞主候望郎隋有天

文博士唐初因之長安二年改為靈臺郎乾元元年

改五官之名

六典

宋初司天監有靈臺郎慶厯詔十年

遷元豐雖改太史局有靈臺之名如故惟試中乃遷

會要

保章正周禮春官太史屬有保章氏秦漢以來無其職
後周春官府置太史其屬有保章上士中士即其任
也至隋置厯博士唐長安四年改厯博士為保章正

掌教歷生乾元元年加五官之名六宋初司天監有

保章正慶歷五年詔保章十年一遷官元豐改太史

局而保章正如故掌歷法及測景分至表準五年一

遷官

會要

挈壺正周制夏官有挈壺氏秋官有司寤氏春官難人

氏凡三職咸掌其事自漢以後太史掌之唐長安四

年始置挈壺正掌知刻漏孔壺為漏浮箭為刻以考

中星昏明之候乾元元年加五官之名六宋初司天

監有挈壺正元豐改太史局而挈壺正如故太史局
官有五年一遷者十年一遷者有試中而遷者惟挈

壺正無遷法

會要

醫官

和安成和成安成全大夫

舊為軍器庫使

保和保和大夫

舊為西綾錦使

保安大夫

舊為樞密使

翰林良鑒

舊為翰林鑒官使

和安成安成

和成全郎

舊為軍器庫副使

保和保和郎

舊為西綾錦副使

保安郎

舊為樞密

副翰林鑒正

舊為翰林鑒官副使

翰林鑒官翰林鑒效翰林鑒

痊翰林醫愈翰林醫證翰林醫診翰林醫候翰林醫
學

舊諸司使副有醫官使及副使蓋自太醫丞直院轉醫
官副使叙遷年格一同武官但為東班使額耳

謂自法酒庫以上至皇城使

政和初既易武階而醫官之名亦遂焉凡十有四階立
和安大夫視權易使以上翰林良醫視醫官使其和安
郎以下視東副使若醫官副使則以翰林醫正易之

官制舊典云此名皆大臣所撰無所稽據傳白登高能賦可以為大夫今乃以雜流為之可見當時大臣之不學也

舊額和安大夫至良鑒二十員紹興二年五員和安郎至鑒官元額三十員紹興二年四員鑒効元額七員紹興二員鑒痊元十今一員鑒愈至祗候大方脉元額百五十員紹興十五員而已

中興會要

后妃

內官命婦附

帝嚳有四妃以象后妃四星

其一明者為正妃餘三小者為次妃

帝堯因焉舜

不告而娶

不立正妃但三妃而謂之夫人

離騷所歌湘夫人舜妃也

夏后氏增以三三而九合十二人

春秋說云天子娶十二女即夏制也

殷人又增以三九二十七合三十九人

周人法帝嚳立正妃又三九二十七為八十一人合百

二十一人其位后也夫人也嬪也世婦也女御也五者

相三以定尊卑焉

以上鄭玄所云

○故禮曰古者天子后立六

宮三夫人九嬪二十七世婦八十一御妻以聽天下之

內治

天子立六官三公九卿二十七大夫八十一元士以

聽天下之外治

並通典

漢興因秦之稱號帝母稱皇太后帝祖母稱太皇太后
正嫡稱皇后妾皆稱夫人又有美人良人八子七子長

使少使婕妤

武帝加置婕妤

嬪娥

武帝加置

容華充衣

武帝加置

昭儀

元帝

加置

五官順常儻涓共和娛虛寶林良使夜者上家人子

中家人子

前漢外戚傳

後漢皇后紀論曰后正位宮闈同體天王三夫人坐論婦禮九嬪掌教四德世婦主知喪祭賓客女御序于王之燕寢頒官分務各有典司女史彤管記功書過居有保阿之訓動有環佩之響所以能述宣陰化修成內則閨房肅雍險謁不行者也光武悉闕此號唯皇后如舊

有貴人

貴人金印紫綬

○美人宮采女皆無祿秩四時賞賜而

已

漢法常因八月筭民遣中大夫與掖廷丞及相工於

洛陽鄉中閱視良家童女年十三以上二十以下姿

色端麗載還後宮擇視可否

分紀

魏武帝因西漢置夫人昭儀婕妤容華美人文帝增置

貴嬪一人

並位次皇后

淑媛修容順成良人明帝又增淑妃

昭華修儀似夫人以下爵凡十二等○唐后妃傳唐自

隋制皇后之下有貴妃淑妃德妃賢妃並為夫人昭儀
昭容昭媛脩儀修容修媛充儀充容充媛為九嬪婕妤
九人美人九人才人九人寶林二十七人御女二十七
人其餘六尚諸司分典乘輿服御元宗以后下復有四
妃非是乃置惠麗華三妃以代三夫人又置六儀四美
人七才人而尚宮尚儀尚服各二人參合前號大抵踵
周官相損益云分紀宋朝沿唐制置貴妃淑妃德妃賢妃
此古之所謂四妃佑皇后論婦禮於內者也秩視三公

恩同宰相累朝多闕元豐纔有二員政和後冊妃至六七人次有九嬪秩視六卿次有婉容婕妤恩比侍從宮女有貴人才人美人郡君皆有閤分恩各有差而以時御于帝所若受帝祉生男則遷兩等生女則遷一等遇覃恩方槩進一官故於叙遷甚艱祖宗惜名位雖於內寵未嘗用私恩

官制舊典

又云至和嘉祐間嬪御久不得遷屢有干請上答以無典故又上笑答汝不信試與降旨政府遂執奏無

法或有只請御筆進官者上取彩牋戲書云某官某氏特轉某官至給奉時各出御書請增祿有司不敢遵用退復訴於上前上笑以遣之咸服仁宗之聖斷其禁中執事六次者封郡國夫人其逮事兩朝若乳保至尊則進封四加國號保聖焉

明道初以仁宗母順容李氏為宸妃宸妃之號惟此一見焉乾興末初仁宗即位尊淑妃楊氏為皇太妃元豐末哲宗即位尊德妃朱氏為皇太妃太妃之號前後再

見焉

職畧

外命婦

三代之制諸侯之婦曰夫人大夫曰孺人士曰婦人庶人曰妻公侯有夫人有世婦有妻有妾邦君之妻君稱曰夫人夫人自稱於天子曰老婦自稱於諸侯曰寡小君自稱於其君曰小童邦人稱之曰君夫人自世婦以下自稱曰婢子

婢之言卑也

凡婦人無爵從夫爵坐以夫之

齒至秦漢始有封君之號公主及邑司之制元壽七年

始令列侯太夫人夫人無得擅徵捕唐外命婦制

皇后妃嬪及太子良娣以下為內命婦公主及王妃

以下為外命婦

諸王母妻及妃文武官一品國公母妻為國夫人三品

以上母妻為郡夫人四品母妻為郡君五品母妻為縣

君散官同職若勲官四品有封母妻為鄉君其母邑號

皆加太字視夫子之品

通典

宋朝舊制外命婦有國夫

人郡夫人郡君縣君之號初以為此特沿五代之制且

非婦道也乃別造新名以命之

政和二年蓋古者妻隨其夫之爵國家承襲五代或有未革今命婦猶列郡縣以稱君蓋非婦道又等級既少輕重不倫可改依下項武臣准此事見詔旨執政以上封夫人

太師太傅太保左丞相右丞相少師少傅少保正樞密使開府儀同三司封國夫人知樞密院事參知政事同知樞密院事樞密副使簽書樞密院事特進太

尉太子太師太傅太保觀文殿大學士太子少師少
傅少保金紫銀青光祿大夫光祿大夫左右金吾衛
上將軍左右衛上將軍節度使封郡夫人

尚書以上封淑人

御史大夫觀文殿大學士資政保和殿大學士六曹
尚書翰林學士承旨翰林學士資政保和端明殿學
士龍圖天章寶文顯謨徽猷敷文閣學士

侍郎以上封碩人

左右散騎常侍權六曹尚書御史中丞開封府尹六曹侍郎樞密直學士龍圖天章寶文顯謨徽猷敷文閣直學士宣奉正奉正議通奉通議大夫左右驍衛以下諸衛上將軍殿前都指揮使承宣使太中大夫觀察使入內內侍省内侍省都知帶遙郡團練使以上政和殿中監大司成

太中大夫以上封令人

太子賓客詹事給事中中書舍人殿前副都指揮使

左右諫議大夫權六曹侍郎樞密都承旨保和殿待
制龍圖天章寶文顯謨徽猷敷文閣待制太常宗正
卿祕書監中大夫七寺卿中奉中散大夫防禦團練
使左右金吾以下諸衛大將軍入內內侍省內侍省
副都知押班帶遙郡團練使以上政和大司樂殿中
少監

中散大夫以上封恭人

通侍大夫馬軍都指揮使副都指揮使步軍都指揮

使副都指揮使國子祭酒太常宗正少卿祕書少監
正侍宣正履正叶忠忠侍中亮大夫太子左右庶子
中衛翊衛親衛拱衛左武右武大夫諸州刺史駙馬
都尉集英殿修撰七寺少卿朝議奉直大夫入內內
侍省內侍省都知武功至武翼大夫帶遥郡團練使
以上宣政使政和典樂

朝奉大夫以上並封宜人

中書門下省檢正諸房公事尚書左右司郎中右文

殿修撰國子司業少府將作軍器監都水使者太子
少詹事左右諭德入內內侍省內侍省副都知押班
樞密承旨樞密副都承旨起居郎起居舍人侍御史
尚書左右司員外郎樞密院檢詳諸房文字祕閣修
撰開封少尹尚書六曹郎中開封府判官推官直龍
圖閣朝請朝散朝奉大夫管客省四方館閣門公事
武功至武翼大夫帶遙郡刺史武功至武翼大夫政
和辟雍司業知引進司公事

朝奉郎以上封安人


直天章閣殿中侍御史左右司諫正言符寶郎內符
寶郎正侍宣正履正叶忠中侍中亮中衛翊衛親衛
拱衛左武右武郎樞密副承旨尚書六曹員外郎同
管客省四方館閣門公事樞密院諸房副承旨直寶
文閣開封府司錄參軍事朝請朝散朝奉郎少府將
作軍器少監監察御史和安成和成安成全平和保
安大夫諸衛將軍著作郎武功至武翼郎政和簽書

引進司公事殿中丞

通直郎以上封孺人

直顯謨徽猷敷文閣承議郎翰林良鑒和安至保安
郎翰林鑒官直祕閣左右郎將奉議郎太常宗正祕
書丞大理正太史局令判太鑒局閤門舍人宣贊舍
人翰林鑒效鑒痊太子左右衛司禦清道監門率府
率七寺丞祕書郎著作佐郎國子監丞諸王宮大小
學教授國子博士大理司直評事敦武郎通直郎修

武郎政和直翰林暨官局太暨丞太常博士祕書省
主簿辟雍丞



羣書考索後集卷二十

欽定四庫全書

子部
羣書考索後集卷二十一

詳校官中書臣竇汝翼

主事臣祁韻士覆勘

總校官知縣臣楊懋珩

校對官中書臣徐夢雲

謄錄監生臣郭洽怡

欽定四庫全書

羣書考索後集卷三十一

宋章如愚編

官制門

唐官制

唐之官制名號祿秩雖因時增損而大抵皆沿隋故其
官司之別曰省曰臺曰寺曰監曰衛曰府各統其屬以
分職定位其辨貴賤敘勞能則有品有爵有勲有階曰

尚書曰門下曰中書曰祕書曰殿中曰內省此六省也
曰太常曰光祿曰衛尉曰宗正曰太僕曰大理曰鴻臚
曰司農曰太府此九寺也臺有御史而其屬則有三院
監有五監而其名則自國子而至於都水左右衛而下
有曰驍衛曰武衛曰威衛而至於金吾衛千牛衛者凡
十六衛焉左右率府而下有曰親府曰勳府曰翊府而
至於司禦率府內率府者凡十率府焉然其中別位叙
之崇卑則有品自一品而至于九品有正有從而正四

品而下又有上下之別凡三十等焉定食邑之多寡則有爵自子男而上以至于王而各比其品之數者凡有九等焉自武騎而上至于護軍自護軍而上極于上柱國凡十有二等者所以為勞能之別也自開府而下至于將仕二十九階自驃騎而下至于陪戎四十五階所以為文武之別也方唐之盛時其制如此蓋其始未嘗不欲立制度明紀綱為萬世法而常至於交侵紛亂者由其時君不能謹守而循一切之苟且故其事愈繁而

官愈冗至失其職業而卒不能復初太宗省内外官定制為七百三十員曰吾以此待天下足矣然是時已有員外之置其後又有特置同正員至於檢校兼守判知之類皆非體制又有置使之名或因事而置事已則罷或遂置而不廢其名類繁多莫能徧舉且宰相之職佐天子總百官治萬事其任重矣然自漢以來位號不同而唐世宰相名尤不正唐初因隋制以三省之長共議國政其後太宗為尚書令由是僕射為尚書省長官與

侍中中書令號為宰相其品位既崇不欲輕以授人故常以他官居宰相職而假以他名太宗時杜淹以吏部尚書參議時政魏證以祕書監參預朝政其後或曰參議得失參知政事之類其名非一皆宰相職也貞觀八年李靖以疾而平章事而平章事之名起於此李勣以詹事同三品而同三品之名起於此自開元以後常以領他職實欲重其事而反輕宰相之體故時方用兵則為節度使時崇儒學則為大學士時急財用則為鹽鐵

使又其甚則為延資庫使至於國中太清宮之類其名頗多皆不足取然其失非特宰相也自開元以來諸使紛出李傑則為水陸運使宇文融則為租庸使裴耀卿則為江淮轉運使論度支則以李元祐為之使論鑄錢則以羅文信為之使以至木炭則有使青苗則有使修書則有使群牧置使而太僕不得盡其職戶口置使而戶部不得專其任無非奪百司之職者故百司之任最為侵紊御史彈擊之司也知太府之出納者有之

楊慎
孫

禮部掌禮樂之司也而掌吏部之十銓者有之

燕陵夷題

至于後世遂至於無復職掌劉蕡對策以為夏官不知
兵籍止於奉朝請大將不主兵事止於養勲封而陸長
源上宰相書亦曰兵部無戎帳戶部無版圖虞水不管
山川金倉不司錢穀光祿不供酒衛尉不供幕祕書不
校勘著作不修撰亦可知矣雖然唐初之制亦有足取
者至後世不存矣官以勞考叙進所以考功也自高宗
設泛階而其制以壞內侍不置三品所以防患也自元

宗用高力士而其法復隳銓曹注授之法既變於裴光庭而門下過官之制又廢於楊國忠立法之善意不可見矣

唐考功九等法

唐考功之法掌於吏部京官之考則郎中主之外官之考則員外主之而又有監中外官考使以涖督其事凡百官之長歲較其屬之功過州牧刺史縣令每歲亦上其狀於考司監領之官差以九等大合衆而讀而唱第

於尚書而後奏之代流內之官叙以四善焉善狀之外
又有二十七最焉夫所謂四善者何也德義有聞也清
慎明著也公平可稱也恪勤匪懈也此之謂四善夫所
謂二十七最者何也獻可替否拾遺補闕是近侍之最
也銓衡人物擢盡才良是選司之最也揚清激濁褒貶
必當是考校之最也禮制儀式動合經典是禮官之最
也其於音律克諧不失節奏則為樂官之最其於決斷
不滯予奪合理則為判事之最其於部統有方警守無

失則為宿衛之最其於兵士調習戎裝充備則為督領之最若乃法官之最則以推鞠得情處斷平允者為之校正之最則以讎校精審明於判定者為之宣納之最則以承旨敷奏吐納開敏者為之學官之最則以訓導有方生徒充業者為之以至於賞罰嚴明攻戰必勝是之謂軍將之最禮義興行肅清所部是之謂政教之最詳錄典正辭理兼舉是之謂文史之最訪察精審彈舉必當是之謂糾正之最曰勾稽曰監掌曰役使曰屯官

曰倉庫既各定其最矣而厯官之推步方術之效驗關
津之檢察市司之不擾亦莫不各有最焉雖牧官之微
鎮防之遠亦以牧養之肥碩邊境之清肅者為之最此
之謂二十七最也故一最四善為上上一最三善為上
中一最二善為上下其無最而有二善者次之無最而
有一善者又次之善最不聞者斯為下矣甚而或至於
愛憎之任情或背公而向私或居官之貪濁者皆列於
下之三等焉觀其九等之差猶詳於其所謂善而畧於

其所謂最也蓋善者德也最者才也唐之法猶可嘉焉
凡考中上以上每進一等則有加祿之法中下以下每
退一等則有奪祿之法此又所以寓懲勸之微意也

唐三銓之法

通典云在尚書者則為尚書銓分
於侍郎者則為中銓為東銓唐六

典曰又以三類勸其異一曰
德行二曰才用三曰勞效

凡選有文武文選則吏部主之武選則兵部主之皆為
三銓之法在尚書則典其一在侍郎則分其二而其擇
人之法有四一曰身所以取其體貌之豐偉也二曰言

所以取其言辭之辯正也三曰書所以取其楷法之道
美也四曰判所以取其文理之優長也四者皆在所可
取則又以德行先之德均則以才才均則以勞其得者
為留其不得者為放自五品以上則不試于選特以冊
以制以勅而授之自六品以下始集而試觀其書判已
試而銓察其身言已銓而注詢其便利已注而唱則以
類而聯其名先簡於僕射而乃上於門下給事中讀之
黃門侍郎省之侍中審之不審者則駁其非既審者則

以聞主者受旨而奉行焉謂之奏受其視品及流外官則判補之皆給以符而謂之告身凡試判登科則謂之入等而其拙者則謂之藍縷選未滿而試文三篇者謂之宏詞試判三條者則謂之拔萃而其中者則以官授之此選法之大畧也自是而外又有所謂小選曰東選曰南選之名凡流外兵部禮部舉人郎官得自主之者則謂之小選東人選者或集於洛州則謂之東選嶺南黔中之屬郡縣之官不由吏部乃遣郎官御史而為選

補使則謂之南選其名亦不一焉然其名雖不一而所以擇之之法當不易也自裴行儉設長名榜引銓注法復定升降之等而銓法於是而始改張仁偉員外郎造姓厯改狀樣銓厯之法而銓法於是而遂密裴光庭作循資格而賢愚一槩必與格合乃得銓授而銓法於是而遂變姚崇宋璟之流患斜封墨敕之濫也乃合三銓而通掌之於是有通銓之事宇文融患吏部選試之不公也欲精其選而分掌之於是有十銓之名其後楊國

忠以右相而兼吏部悉唱注於都堂以誇神速而門下過官三銓注官之法遂一旦而盡廢此法之所以壞也然銓法在唐盛時諸公固已病之如杜如晦則曰今吏部取人獨舉其言辭刀筆而不詳才行張九齡亦曰今吏部始造簿書以備遺忘而反求精於案牘不急人才而時人有平配之誚官曹無得賢之實至沈既濟言四大之弊於德宗之時則又以為考校之法皆在書判簿歷言辭俯仰之間安行徐言非德也空文善書非才也

累資積考非勞也則是唐之法猶未為良法也雖然亦存乎人而已矣如鄭愔之納貨而選人滯留崔湜之納賂而銓選無序李義府無品鑒才而谿壑之欲惟賄是利則安望其得人若高季輔之在太宗時善銓序人物至賜金鑑以况其清鑒李義之在睿宗時請謁不行而時人有李下無蹊徑之譽則亦何病於法乎其他若馬載若盧從愿若李朝隱或摘檢詭偽而以平允聞或罷黜斜封而不避怨誹者則銓法未嘗不善也故史臣載

前有裴馬後有盧李有深意矣

唐六典

唐六典之書作於元宗之開元也方開元之十年詔於集賢院修定六典而元宗手寫六條曰理教禮政刑事時張說委徐堅為之經歲而無規制乃命韋述等參撰始以令式象周禮六官其後蕭嵩張九齡之徒亦與焉至二十六年而書始成凡三十卷嘗以其書而攷之自太師太傅太保則為三師太尉司徒司空則為三公尚

書都省門下省中書省祕書省殿中省內侍省則為六
省御史之官則為御史臺曰太常曰光祿曰衛尉曰宗
正曰太僕曰大理曰鴻臚曰司農曰太府則為九寺曰
國子曰少府曰軍器曰將作曰都水則為五監曰左右
衛曰左右驍衛曰左右武衛曰左右威衛曰左右領軍
衛曰左右金吾衛曰左右監門衛曰左右千牛衛則為
十六衛左右羽林軍則為北衛其他如東宮五府之官
京兆河南太原三府之官督府州縣之官皆可於其書

而攷焉且以三師三公言之皆古宰相之職也唐不常置蓋三師三公皆正一品雖尚書令亦不過正二品左右丞相不過從二品耳故吏部叙階凡二十有九乃自從一品以下而三師三公不在焉蓋三師三公之尊非可以叙遷也以六省言之尚書都省則有尚書令有左右丞相有左右丞有六部之屬夫尚書令號為端揆之官所以統乎六部而為之長也自武德中太宗嘗親其職自是闕而不置其國政樞密皆委中書八座之官但

受其成事而已若令闕則以左右僕射為省主此唐尚書令之制也左右丞相在咸亨中名為僕射自開元而始為左右丞相之名唐初未嘗不知國政也自開元中張說兼之後罷知政而猶為丞相自此以後遂不知國政而丞相為虛名耳此唐丞相之制也糾舉憲章以表六官之儀制正百僚之文法若御史有糾劾不當兼得彈奏此唐左右丞之制也吏部之叙有尚書有侍郎所以掌天下之官也故郎中則有叙階之法自開府儀同

為從一品而至于文林將仕之從九品凡二十九焉而其中自四品而下每品又有上下之別其叙階也有以封爵有以姻戚有以勲庸有以資蔭有以秀孝有以勞考其嶺南黔中三年一置選補使則號為南選郎中所掌之選則號為少選京司之吏未入九流者謂之流外銓員外所掌之選院則號為南曹司封司封爵之制自王而至于子男則有九等司勲勲級之制自上柱國而至于武騎雲騎則有十二等考功之法則有四善二十

七最此吏部之大畧也戶部之職有尚書有侍郎所以掌天下之戶口土田也貢賦之差則分為十道戶之資產則定為九等給田之制則曰永業曰口分凡有二焉賦役之制曰租曰調曰役曰雜徭凡有四焉此皆戶部之大畧也禮部尚書之與侍郎所以掌天下之禮儀貢舉之政令也而其屬曰禮部曰祠部曰膳部曰主客凡五禮之儀吉凶軍賓嘉凡一百五十有二舉試之制自秀才明經進士明法書算其科有六此禮部之大畧

也兵部尚書之與侍郎所以統天下之軍衛武選也其屬曰兵部曰職方曰駕部曰庫部以三銓之法領其事以五等閱其功以三奇拔其異武官之勲祿品命自驃騎輔國而下至于仁勇陪戎叙階之法凡二十有九焉自上柱國而下至于雲騎武騎勲官之等亦十有二焉左右衛之親勲翊則通謂之三衛左右衛之三衛則分為五仗成丁而入六十而免量其遠近以定其番第自京兆河南蒲同華岐等則皆令番上餘州則納資而已

凡親王總戎則曰元帥文武官總統則曰總管以奉使而言之則曰節度使凡天下之節度有八又有大使副使之名焉職方之掌鎮戍有上鎮中鎮下鎮上戍中戍下戍之號駕部之掌輿輦車乘天下之傳驛凡三十里一驛焉此兵部所統之大畧也刑部之職掌天下之刑法自尚書侍郎而下其屬有四曰刑部曰都官曰比部曰司門文法之名有四曰律曰令曰格式此刑部之大畧也工部之職掌天下之百工屯田自尚書侍郎而下

其屬有四曰工部曰屯田曰虞部曰水部凡軍州邊防
鎮守轉運不給則設屯田以益軍儲凡天下諸軍州管
屯總九百九十有二凡屯各有屯官屯副文武職事官
則有職分田在京諸司則有公廨田此工部之大畧也
自侍中黃門侍郎而下曰給事中曰左散騎常侍曰左
諫議大夫曰左補闕拾遺曰起居郎曰弘文館學士則
皆屬於門下省焉自中書令中書侍郎而下曰中書舍
人曰右散騎常侍曰右補闕拾遺曰起居舍人曰通事

舍人曰集賢殿書院學士曰集賢院學士曰史館則皆屬於中書省焉夫侍中所以掌出納帝命而黃門為之貳至給事中則分判省事百司奏抄侍中審定則先讀而書之以駁正遺失此門下之制也中書令所以掌軍國之大政而侍中為之貳至中書舍人則詔旨制敕起草進畫既下則行之此中書之制也然曰散騎曰諫議曰補闕曰拾遺其左乃屬於門下其右乃屬於中書何也曰起居曰弘文既屬之門下矣曰舍人曰通事曰集

賢曰史館乃屬之中書何也竊考唐中書門下之兩省
乃在於宣政殿之東西廡其地亦邃矣則凡諫正之事
講論之益記注之官正欲隨所在而致其力也是以命
出於中書則造命之地有人焉命行於門下而審覆之
地有人焉此建官之美意也至於祕書監之掌經籍圖
畫之事而有經史子集四部之別其下又有二局焉曰
著作局者所以掌撰碑文之屬曰太史局者所以掌歷
數天文之事此又祕書省之制也其外有殿中省內侍

省並列為六省焉至於御史臺則以御史大夫為之長
曰中丞曰侍御曰殿中曰監察御史皆臺官也自馬周
以布衣太宗令於監察御史裏行自此遂有裏行之號
此御史臺之制也其次太常光祿而下及于太府者九
寺之制也國子監而下及于都水者五監之制也左右
衛而下曰驍騎曰武騎曰威衛曰領軍衛曰金吾衛曰
監門衛曰千牛衛皆有左有右者此十六衛也夫所謂
衛者何也唐制每衛則有大將軍有將軍有中郎將凡

兵士隸衛各有其名隸左右衛者則曰驍騎隸驍衛者則曰豹騎隸武衛者則曰熊渠隸威衛者則曰羽林隸領軍衛者則曰射聲隸金吾衛者則曰攸飛總名為衛士皆取六品以下子孫充之如左右衛大將軍職掌宮庭警衛之法凡親勲翊五中郎將及折勲府所隸者皆總衛焉則左右衛者又諸衛之長也其曰親府曰勲一府曰勲二府曰翊一府曰翊二府號曰五府總曰三衛皆左右衛之制也若左右驍衛武衛威衛左右領軍衛

其掌皆如左右衛而金吾則掌宮中及京城巡警之法
監門衛則掌諸禁衛門籍之法千牛衛則掌宮殿侍衛
及宮御之儀仗者也每府則有折衝都尉左右果毅都
尉夫折衝之職掌領五校之屬以備宿衛凡衛士三百
人為團以一校尉領之以便習騎射者為越騎餘為步
兵其團十人為火凡兵馬在府每季冬折衝都尉率五
校之屬以教其軍陣戰鬥之法其果毅則為之貳此皆
十六衛之制也杜牧以為內以十六衛蓄養戎臣唐會

要以為置十二衛將軍分關中諸府隸焉唐制以為唐因隋置十二衛唐鑑載武德中以十四衛為京職事官其說不同何也蓋唐志十六衛中領府者十有二而監門千牛不與焉十六衛之外又有左右羽林軍職統北衛禁軍之法此皆見於六典之可攷者也然六典之建實倣周制今以李林甫所注者攷之如六部尚書所以倣周之六卿也尚書之下有侍郎所以倣周禮六官之貳也郎中之制所以倣周禮六官之屬所謂下大夫者也

員外之制所以倣周禮六官之屬所謂上士者也不獨此也中書令者所以倣周之內史也史館史官所以倣周之太史小史也秘書省所以倣周之外史也然則六典之建豈非有意於法古哉然侍中黃門本秦漢之制也給事諫議亦秦漢之制也尚書六曹之名蓋自漢而始盛散騎常侍之名蓋自魏而始合唐實踵而行之則其所謂法古者又不獨在於周矣然唐之制雖不純於周而其親近儒士之意則猶古意何也有常叅官有供

奉官有清望官有清官皆儒士也如五品以上職事官八品以上供奉官至於太常博士之屬則謂之常參官侍中中書令左右散騎常侍黃門中書侍郎諫議大夫給事中中書舍人起居郎起居舍人左右補闕拾遺中丞侍御史之屬則謂之供奉官黃門侍郎尚書左右丞諸司侍郎太常少卿祕書少監國子司業等則謂之清望官如諭德如給舍臺諫左右史諸司員外郎至於四門助教皆謂之清官每日以三品已上清官兩人侍制

於衙內此豈非樂親儒士之意乎如弘文集賢翰林學士之類則又有可言者自武德貞觀以來妙選賢良文學之士為弘文學士曰直學士曰文學直館所置無員數自褚無量檢校館務而學士號為館主其後有張太素劉禕之范履冰並以特勅相次為館主此非弘文之盛事歟自太宗秦府學士之後弘文崇文皆有學士元宗大收羣書以廣儒術命褚無量馬懷素校四部書於乾元張說為修書使於是改修書所為集賢殿書院以說為大學士其後更

置修撰校理多以他官為之加無量懷素侍講之號至集
賢院學士則又脩顧問應對承旨撰集文章此又集賢之
盛事也獨六典所載而於翰林學士特缺焉然以唐百官
志考之則知翰林之有學士乃在於開元之二十六年而
六典固已成故唐志謂弘文集賢分隸中書門下省而翰
林學士獨無所屬特附於百官之序云今其言曰唐制乘
輿所在必有文詞經學之士自太宗時名儒學士時時召
以草制然猶未有名號乾封以後始號為北門學士元宗

初置翰林待詔以張說張九齡為之掌四方表疏批答應和文章號翰林供奉與集賢院學士分掌制誥書敕開元之二十六年始改供奉為學士別置學士院專掌內命選用益重而禮益親至號為內相初無定員自諸曹尚書而下至校書郎皆得與選內宴則居宰相之下一品之上憲宗又置承旨於是又有翰林承旨之名豈非其尊重儒生之意乎此其制度之美也若夫凡出身非清流者不注清資之官凡注官階卑而擬高者則曰守階高而擬卑

者則曰行其在吏部兵部考功都省御史臺中書門下是謂之前行要望目為七司其餘則曰後行閑局其制亦不可不知也然以唐志而較之六典專於尚書令之下則曰左右丞相而唐志乃謂之左右僕六典於太學博士之下則繼以四時博士而唐志於太學博士之下乃有廣文館博士天寶時置唐志於羽林軍之後又有左右龍武神武神策之名而六典無之此豈非六典所載乃開元以前之制而唐志所載者乃開元以後之制乎

此又攷制度之所當知者故附見焉

唐太宗定功臣

高祖論太原首功自裴寂劉文靜而下至于趙文恪許世緒之徒凡十有四人武德九年太宗復定功臣而文靜已沒故自寂而下至于秦行師馬三寶之屬等其功之小大而第之總為四十有三人焉今以其傳而攷之自趙文恪而下十有八人雖附見於裴寂傳後而其功不為甚顯君子不暇論也惟寂等三十人已見於傳則

其功有可言者如裴寂之共建大計長孫無忌之入定
大難李藥師之南平江陵北破突厥西定吐谷渾而遼
東之役猶有雖老尚堪一行之語則靖之功為可知李
懋功之平建德俘世充降黑闥而又破頡利於磧北使
突厥稽首請命而不敢南向殆有賢於長城者則勦之
功為可知其他如從破建德則羅藝尉遲敬德從平黑
闥則李子和殷開山至於徇巴蜀降蕭銑則趙王孝恭
也平師都討谷渾則柴紹也破潼關而遂定陝者長孫

順德也從戰東都以少擊衆者王君廣也劉弘基之討
薛舉劉政會之圖武周竇軌之起兵募衆畧地渭南高
士廉之能舉交趾歸心附義屈突通不牽於質子之愛
而以死許國故有烈士徇名之稱唐儉雖有武周之辱
猶籍府庫而有不敢忘朝廷之志秦叔寶之先鋒鏖陣
程知節之寡旗先登封德彝之議軍事而高祖謂雖張
華叶策晉武亦何以加則軍謀為可取段志元之堅守
軍門而太宗謂周亞夫亦何以加則軍政為可法蕭瑀

有疾風勁草之節足為社稷之臣杜淹有才辨多聞之名足居左右之任宇文士及當濟北豪傑竊觀形勢之時而能獨歸王室張亮當謀伐高麗他人畏怯之時而毅然請行張公謹之經畧突厥侯君集之能平高昌此皆其效績於一戰之間者也故史臣贊之曰帝王之興其威靈氣燄有以動物悟人者故士有一槩皆填然躍而附之若椽榱梁柱以成大室又負偃植各安所施而無遺材諸將之謂耶雖然又有大於此者玄齡杖策軍

門一見如舊獨收人物致于幕府下與諸將密相申結
人人願盡死力故太宗嘗曰玄齡有決勝帷幄立社稷
功蕭何所以先諸將也則玄齡之功為如何如晦之常
從征伐叅謀帷幄時方多事裁處無留莫見其涯故玄
齡嘗謂帝曰必欲經營四方捨如晦無共功者則如晦
之功為如何若夫玄齡之善謀如晦之善斷二人同心
叶濟以佐帝室當紀綱彫弛之餘而能興仆植僂使號
令典刑燦然罔不備雖數百年猶蒙其澤可謂名相然

求其所以致之之蹟逮不可見何哉唐柳芳有言削定禍亂而房杜不言功王魏善諫而房杜遜其直英衛善兵而房杜濟以文持衆美而效之君輔贊彌縫而藏諸用使人由而不知是後新進更用事立齡身處要地而不吝權善始以終此其成令名者故當時語良相必曰房杜云此又餘子之所可並論也然而武德功臣之次不始於房杜而乃以裴寂為先豈非特以晉陽之始謀乎其後至德宗時錄武德以來宰相功臣詔差為二等

凡增至百八十有七人每等則以武德以來宰相為首功臣次之至德肅宗以來將相又次之故房杜之名乃在諸臣之首今自房杜而下至于南霽雲凡八十二人為第一等自竇威而下至于李愬姚閭凡百有五人為第二等並載其名於忠義傳後者即當時所定之次也裴寂傳始高祖論太原首功詔尚書令秦王尚書左僕射裴寂納言劉文靖恕二死

左驍衛大將軍長孫順德 右驍衛大將軍劉弘基

右屯衛大將軍竇琮

左翊衛大將軍柴紹

內史侍郎唐儉

吏部侍郎殷開山

鴻臚卿劉世龍

衛尉少卿劉政會

都水監趙文恪

庫部郎中武士彟

驃騎將軍張平高

李思行 李高遷

左屯衛府長史許世緒等十四人恕一死 武德九

年十月太宗又定功臣封戶時文靜已死乃自寂而

下差功大小第之摠四十三人

寂戶千五百

長孫無忌

王君廓

尉遲敬德

房玄齡

杜如晦戶千三百

長孫順德

柴紹

羅藝

趙郡王孝恭戶一千二百

侯君集

張公謹

劉師立戶千

李勣

劉弘基戶九百

高士廉

宇文士及

秦叔寶

程知節戶七百

安興貴

安脩仁

唐儉

竇軌

屈突通

蕭瑀

封德彝

劉義節戶六百

錢九隴

樊興

公孫武達

李孟常

段志玄

龐卿惲

張亮

李樂師

杜淹

元仲文戶四百

張長遜

張平高

李安遠

李子和

秦行師

馬三寶戶三百

長孫無忌傳貞觀十一年乃詔有司朕憑明靈之佑
賢佐之力克剪多難掃清宮內蓋時屯共資其力世安
專享其利朕所不取刺史古諸侯雖名不同而監統
一也無忌等義貫休戚效挺夷儉嘉庸懿績簡在朕
心其改錫土宇用世及之制乃以

無忌為趙州刺史以趙為公國

房玄齡宋州刺史國於梁

杜如晦贈密州刺史國於萊

李靖濮州刺史國於衛

高士廉申州刺史國於申

道宗鄂州刺史王江夏

尉遲敬德宣州刺史國於鄂

侯君集陳州刺史國於陳

孝恭觀州刺史王河間

李勣蘄州刺史國於英

段志玄金州刺史國於褒

程知節普州刺史國於盧

劉弘基朗州刺史國於夔

張亮李州刺史國於郾

凡十有四人餘官食邑尚不在

李澄傳武德功臣十六人貞觀功臣五十三人至德功臣二百六十五人德宗即位錄武德以來宰相及實封功臣子孫賜一子正員官史館攷勲名特高者

九十二人以三等條奏第一等以其歲授官第二等
以次年第三等子孫數訟於朝有詔差為二等增至
百八十七人每等武德以來宰相為首功臣次之至
德以來將相又次之

司空太子太傅知門下省事梁國公房玄齡 尚書
右僕射檢校侍中萊國公杜如晦 太子太保同中
書門下三品宋國公蕭瑀 開府儀同三司同中書
門下三品知政事上柱國中國公高士廉 太子太

師知政事特進鄭國公魏徵 侍中永寧郡公王珪

吏部尚書參豫朝政道國公戴胄 中書令江陵

縣子岑文本 中書令兼太子左庶子檢校吏部尚

書高唐縣公馬周 侍中兼太子左庶子檢校吏部

禮部民部尚書事清苑縣男劉洎 尚書右僕射同

中書門下三品河南郡公褚遂良 太子太師同中

書門下三品燕國公于志寧 尚書右僕射同中書

門下三品兼太子少傅北平縣公張行成 中書令

行侍中兼太子少保脩縣公高季輔 侍中兼太子

賓客襲潁川縣公韓瑗 中書令兼太子詹事南陽

縣侯來濟 侍中兼太子賓客張文瓘 侍中甌山

縣公郝處俊 中書侍郎同中書門下三品兼太子

右庶子酒泉縣公李義琰 內史河東縣侯裴炎

文昌左相同鳳閣鸞臺三品溫國公蘓良嗣 內史

梁國公狄仁傑 納言檢校并州大都督府長史天

兵軍大總管隴右諸軍大使譙縣子婁師德 鳳閣

侍郎同鳳閣鸞臺平章事石泉縣公王方慶 文昌

左相同鳳閣鸞臺三品襲邢國公王及善 尚書右

僕射兼中書令知兵部尚書事齊國公魏元忠 紫

微令梁國公姚崇 正諫大夫同鳳閣鸞臺平章事

朱敬則 尚書左僕射同中書門下平章事許國公

蘓瓌 吏部尚書兼侍中廣平郡公宋璟 黃門監

梁國公魏知古 中書侍郎同中書門下平章事充

國公陸象先 紫微侍郎同紫微黃門平章事許國

公蘓頲 中書令河東縣侯張嘉貞 中書侍郎同

中書門下平章事清水縣公李元紘 黃門侍郎同

中書門下平章事宜陽縣子韓休 中書令始興縣

伯張九齡 司空河東郡公裴寂 納言上柱國魯

國公劉文靖 太尉檢校中書令同中書門下三品

揚州大都督趙國公長孫無忌 禮部尚書河間郡

王孝恭 尚書右僕射檢校中書令行太子左衛率

上柱國衛國公李靖 司空兼太子太師英國公李

勳 開府儀同三司鄜州都督鄂國公尉遲敬德

左光祿大夫洛州都督蔣國公屈突通 陝東道大

行臺吏部尚書鄖國公殷開山 衛尉卿夔國公劉

弘基 澤州刺史邳國公長孫順德 民部尚書上

柱國莒國公唐儉 右驍衛大將軍駙馬都尉譙國

公柴紹 右驍衛大將軍褒國公段志玄 洪州都

督渝國公劉政會 左武侯將軍相州都督鄭國公

張公謹 右武衛將軍盧國公程知節 左武衛大

將軍上柱國胡國公秦叔寶 弘文館學士祕書監

永興縣公虞世南 右衛大將軍兼太子右衛率工

部尚書武陽縣公李大亮 左武衛大將軍邢國公

蕪定方 夏官尚書同中書門下三品清邊道行軍

摠管耿國公王孝傑 中書令漢陽郡公張柬之

中書令博陵郡公崔玄暉 侍中平陽郡公敬暉

侍中譙國公桓彥範 中書令南陽郡公袁恕已

右武衛大將軍同中書門下三品韓國公張仁愿

尚書左丞相兼黃門監徐國公劉幽求 黃門侍郎

參知機務修文館學士齊國公崔日用 兵部尚書

同中書門下三品代國公郭元振 尚書左丞相兼

中書令集賢院學士燕國公張說 紫微侍郎上柱

國趙國公王琚 兵部尚書同中書門下三品持節

朔方軍節度使中山郡公王賔 尚書左僕射同

中書門下平章事兼河南江淮副元帥東都留守冀

國公裴冕 文部尚書同中書門下平章事清河縣

公房瑄 門下侍郎同中書門下平章事衛國公杜

鴻漸 鎮西北庭行營節度使開府儀同三司衛尉

卿兼懷州刺史號國公李嗣業 平盧軍節度使柳

城郡太守劉正臣 恒州刺史衛尉少卿兼御史中丞

顏杲卿 常山郡太守袁履謙 河南節度副使左

金吾衛將軍檢校主客郎中兼御史中丞張巡 睢

陽郡太守兼御史中丞許遠 御史中丞留臺東都

知武部選盧奕 睢陽郡太守特進左金吾衛將軍

南霽雲

右第一

內史令延安郡公竇威 將作大匠判納言陳令公

竇抗 侍中兼太子左庶子江國公陳叔達 納言

觀國公湯恭仁 判吏部尚書參議朝政安吉郡公杜

淹 中書令虞國公溫彥博 中書侍郎檢校刑部

尚書參知機務崔仁師 中書令兼檢校太子詹事

上柱國安國公崔敬禮 戶部尚書平恩縣公許圉

兵部尚書同中書門下三品沮江道行軍總管任
雅相 度支尚書同中書門下三品范陽郡公盧承
慶 西臺侍郎同東西臺三品兼弘文館學士楚國公
上官儀 右相廣平郡公劉祥 左侍極兼檢校左
相嘉興縣子陸敦信 文昌左相同鳳閣鸞臺三品
樂城縣公劉仁軌 荊州大都督府長史安平郡公
李安期 尚書右僕射同中書門下三品兼太子賓
客襲道國公戴至德 司列少常伯太子右中護兼

正諫大夫同東西臺三品趙仁本 中書令趙國公

李敬玄 中書令兼太子左庶子薛元超 中書令

同中書門下三品崔知溫 侍中同中書門下三品

襲廣平郡公劉齊賢 納言樂平縣男王德真 地

官尚書檢校納言鉅鹿縣男魏玄同 文昌左相同鳳

閣鸞臺三品特進輔國大將軍鄧國公岑長倩 鳳

閣侍郎同鳳閣鸞臺三品臨淮縣男劉禕之 納言

博昌縣男韋思謙 地官尚書同鳳閣鸞臺平章事

格輔元 司禮卿判納言事渤海縣子歐陽通 內

史李昭德 鸞臺侍郎同鳳閣鸞臺平章事陸元方

鳳閣侍郎同鳳閣鸞臺三品杜景佺 尚書右僕

射兼太子賓客同中書門下三品鄖國公韋安石

左散騎常侍同中書門下三品知東都留守趙郡公

李懷遠 中書令逍遙公韋嗣立 守侍中同中書

門下三品兼太子右庶子常山縣男李日知 檢校

黃門監渙縣伯盧懷慎 中書令左丞相兼侍中安

陽郡公源乾曜 黃門侍郎同紫微黃門平章事魏

縣侯杜暹 侍中趙城侯裴耀卿 左武衛大將軍

開府儀同三司淮安王神通 特進太常卿江夏王

道宗 荊州都督周國公武士彠 右屯衛大將軍

檢校晉州都督總管譙國公竇琮 少府監葛國公

劉義節 右光祿大夫羅國公張平高 洛州都督

右衛大將軍鄴國公竇軌 夔州都督息國公張長

遜 金紫光祿大夫夷國公李子和 左監門衛大

將軍檢校右武候將軍榮國公樊興 左監門衛大

將軍巢國公錢九隴 右驍衛大將軍歸國公安興

貴 右武衛大將軍申國公安修仁 殿中監郢國

公宇文士及 右武衛大將軍沔陽郡公公孫武達

荊州都督懷寧郡公杜君綽 右驍衛將軍濮國

公龐卿憚 代州都督同安郡公鄭仁泰 右翊衛

將軍遂安郡公李安遠 幽州都督歷陽郡公獨孤

彥雲 始州刺史左屯衛大將軍襄武郡公劉師正

右威衛大將軍濟東郡公李孟嘗 右監門衛大

將軍河南縣公元仲文 右監門衛將軍廬陵郡公

秦行師 左領軍大將軍新興公馬三寶 右衛大

將軍駙馬都尉畢國公阿史那社尒 鎮軍大將軍

虢國公張士貴 左衛大將軍琅琊郡公牛進達

鎮軍大將軍嘉川郡公周護 陝州刺史天水郡公

丘行恭 潭州都督吳興郡公沈叔安 散騎常侍

豐城縣男姚思廉 太子少師同中書門下三品特

進朔方道行軍大總管宋國公唐休璟 左羽林軍

大將軍遼陽郡王李多祚 左領軍大將軍趙國公

李湛 刑部尚書太子賓客魏國公楊元琰 殿中

監兼知總監汝南郡公翟無言 冠軍大將軍左羽

林軍大將軍光祿卿天水縣公趙承恩 將作大

匠裴思諒 右羽林軍將軍弘農郡公楊執一 左

衛將軍河東郡公薛思行 光祿卿駙馬都尉瑯琊

郡公王同皎 中書令越國公鍾紹京 太僕卿立

節郡王薛崇簡 右金吾衛大將軍涼國公李延昌

太子中允同正冀國公馮道力 少府監趙國公

崔諤之 左監門衛中候光祿卿申國公許輔乾

左金吾大將軍鄧國公張暉 朔方道行軍大總管

左羽林軍大將軍平陽郡公薛訥 河南副元帥太

尉兼侍中臨淮郡王李光弼 河南節度副大使守

司空兼兵部尚書霍國公王思禮 左相幽國公韋

見素 太保韓國公苗晉卿 中書令趙國公崔圓

太原節度使檢校尚書左僕射同中書門下平章
事金城郡王辛雲京 河南隴右副元帥兵部尚書
同中書門下平章事涼國公李抱玉 太子太師檢
校尚書右僕射知省事信都郡王田神功 四鎮北
庭涇原節度使檢校尚書左僕射知省事扶風郡王
馬璘 左羽林軍大將軍檢校戶部尚書兼御史大
夫薛景仙 右散騎常侍檢校禮部尚書兼御史大
夫尚衡 太原尹兼御史大夫北都留守河東節度

副大使南陽郡公鄧景山 河東節度副使兼鴈門
郡太守光祿卿賈循 禮部尚書東京留守酒泉縣
侯李愷 東平郡太守姚閭

右第二

唐登瀛之選

武德四年太宗當寇亂甫平之初日不暇給乃作文學
館收聘賢才訪以政事討論墳籍權畧前載于時在選
之士自房杜而下曰于志寧曰蘓世長曰薛收曰褚亮

曰姚思廉曰陸德明曰孔穎達曰李玄道曰李守素曰
虞世南曰蔡允恭曰顏相時曰許敬宗曰薛元敬曰盖
文達曰蘓勉凡十有八人焉其後薛收既卒復以劉孝
孫補之所謂十八學士者此也竊嘗以傳而攷其人之
大畧如玄齡之善謀如晦之善斷同心叶濟以創大業
此固非他人所及者至於收引人物致之幕府而軍符
府檄駐馬即辦陳事千里之外猶對面語者此又玄齡
之偉才也常從征伐叅謀帷幄雖事務煩多而裁處無

留莫見其涯者此又如晦之達識也于志寧識褚亮於
囚虜則其智為可稱蘓世長諫田獵於涇陽則其直為
可喜書檄露布馬上占辭如素成者薛收之敏也出入
軍旅嘗預祕謀而有裨補之益者褚亮之忠也姚思廉
之撰梁陳書顏相時之為漢書決疑虞世南之默寫列
女傳則其才為長於史孔穎達之為五經義訓蓋文達
之明春秋三傳陸德明之說經隨方立義徧析其要則
其才為長於經李元道以草書稱李守素以肉譜稱

本傳云通氏姓學世號肉譜

蔡允恭以能詩稱許敬宗以善屬文稱薛元敬以文翰稱此皆其一藝一能之可采者也獨蘊勉不見於傳而劉孝孫之傳無可書故其事不得而詳焉然皆一時之選也是以當時瀛州之號以為儒士之事而閩立本則為之圖褚亮則又為之贊其後蔣義則又為秦府十八學士史臣傳迨至開元得人之盛亦髣其事而擬其數故唐翰林盛事所載則云張說徐堅賀知章之徒

十有八人為集賢殿學士於東都上陽宮含象亭圖寫其貌今攷於唐藝文雜藝術類中者殷穀韋無忝開元十八學士圖者其意可想也雖然如房如杜如姚如陸如穎達如世南此固其最優者而其次則如志寧如世長如收如亮以至於允恭之徒其事之可見者亦足為國家之盛彼敬宗者果何人耶而亦預是選雖其長安城之對昆明池之對帝丘之對濟漯之對足以為一時辨捷之快其後一言之繆竟為社稷之深禍其視諸公

寧不媿乎若杜淹之才辨多聞攷之本傳亦曰嘗為文館學士矣而名不列于圖魏徵之忠蹇顏師古之明練治體令孤德棻李延壽之史學其為益殆不淺也而反不廁於其間又未知其果何如也此吾猶有遺恨云

初武德四年太宗為天策上將軍寇亂稍平於鄉儒宮城西作文學館收聘賢才於是下教以大行臺

司勳郎中杜如晦

記室考功郎中房玄齡

及于志寧

軍諮祭酒蘇世長

天策府記室薛收

文學褚亮

姚思廉

太學博士陸德明

孔穎達

主簿李玄道

天策倉曹參軍事李守素

王府記室參軍事虞世南

參軍事蔡允恭

顏相時

著作郎攝記室許敬宗

薛元敬

太學助教蓋文達

軍諮典簽蘓昂

並以本官為舉

七年收卒復召東虞州錄事叅軍劉孝孫補之凡分
三番遞宿于閣下悉給珍膳每暇自訪以政事討論
墳籍商榷前載無常禮之嫌命闔立本圖像使亮為
之贊題名字爵里號十八學士藏之書府以章禮賢
之重方是時在選中者天下所慕向謂之登瀛州

褚亮傳

唐凌煙功臣

太宗貞觀之十七年詔圖功臣于凌煙閣自長孫無忌而至于秦瓊凡二十有三人焉夫長孫無忌非以其肺腑之恩也以其數從征伐平大難討突厥之功而預焉河間孝恭非以其宗明之故也以其徇巴蜀破夷陵有方面之功而預焉房杜之謀謨帷幄共定社稷引拔人物致之幕府而臺閣制度皆所裁制足以為元功之首英衛之料敵制勝掃平紛亂降蕭饒俘世充勣破突厥于定襄靖破延陀於磧北足以為元勲之次魏徵

之忠蹇貴重世南之論議懇誠蕭瑀之抑過繩違曾無
所憚此皆以文而有功于社稷者也屈突通之舉兵圍
洛張公謹之副李靖破虜秦瓊之先鋒鏖戰前無堅對
此皆以武而有功于社稷者也其他如敬德如唐儉如
段志玄如劉弘基如殷開山如劉政會如柴紹如程知
節如長孫順德皆其崎嶇兵間戮力王室有功於開創
大業者也至於侯君集張亮雖不克終而其初亦未嘗
無一戰之勇如破谷渾平高昌此君集之可見者也如

舉黎陽伐高麗此張亮之可見者也唐初功臣可謂盛
矣故呂溫贊凌烟之勲臣而其序有曰唐荅公劉渝公
之首戴神堯舉晉陽而拯天下此則大禹之拯溺也
魏鄭公以致君為己任諫若不及此則咎繇之颺言也
虞永興糾合羣儒明備王禮克諧帝樂煥乎其有文章
此則夷夔之制作也長孫趙公舉大義定社稷此則周
公之正救也英衛受天勇智麾定四方此則太公之鷹
揚也房杜並運帷幄謨成大公此則蕭何之指蹤子房

之決勝也尉遲秦程剛毅木訥為王前驅此則吳漢之
樸忠賈復之雄勇也其所取大畧如此亦可見矣然唐
史所載凡二十三人而呂溫之贊乃以春秋之義沒君
集張亮之名而為二十二贊至其序則曰圖畫於凌煙
閣者二十有四人又併高士廉而總言之數之不同亦
不可不知也然而太宗以創業之功歸之羣臣而圖像
之設有古人不忘之意可謂厚矣故其後在永徽時高
宗則又取其終始之著名者圖形于凌煙曰徵曰士廉

曰瑞曰志玄曰洪基曰世南曰瓊者是也在寶應時肅
宗則又圖功臣于凌煙曰郭子儀曰李光弼者是也在
貞元時德宗則詔圖勲臣于舊臣之次曰李晟曰馬燧
者是也在太中時宣宗則又差定元和將相圖形凌煙
曰李絳者是也既又詔求李峴王珪戴胄之徒以至于
李愷凡三十七人皆續之于是閤焉夫子儀光弼豈非
以其再造唐室之功乎取河北復長安回紇涇陽之圍
而乃單騎見虜一以至誠屈之故史臣謂之身為天下

安危者二十年權傾天下而朝不忌功蓋一世而上不
疑者子儀之功為如何以朔方而救常山轉戰太原而
寇盜之鋒為之震龍鬚退沮故史臣謂治師嚴整天下
服其威名而戰功推為中興第一者光弼之功為如何
李晟馬燧豈非以其有扶持社稷之功乎朱泚僭竊於
京師懷光跋扈於咸陽河北三盜盤據而紛錯晟獨提
孤軍以抗之卒能秉義挺忠以翦賊泚之黨史臣謂師
入長安而人不知雖三王之佐無過其能可謂仁義之

將者則李晟之功為如何破田悅於魏博封懷光於河中使中原之地不為盜區其制敵有過人者史臣謂馬燧沉雄忠力聞必決死未嘗折北名蓋一時則馬燧之功為如何至若李絳之在唐每有詢訪隨事補益以直道進退名重一時如連屏之作立石紀德之諫朋黨之諫方鎮進獻之諫用賢豈容易之說皆有補於治道此大中之初所以圖其像也不特此也李峴張鎰之剛直盧奕李愷之忠義王珪之推誠納善戴胄之清直守法

馬周之敷奏明敏張鎬之之論議有體王及善之臨事
不可奪柳渾之守正不阿此皆有益於國者裴寂劉文
靜之共建大計褚遂良之安定社稷劉幽求之叅預大
策五王之興復唐室此又其功之卓卓者至若婁師德
之屯田備邊郭元振之善撫夷夏朱敬則之諫羅織韓
瑗之定律令郝處俊引魏文帝令而明社稷之大誼

遜位武后事曰魏文著令帝崩不許皇后臨朝

李勉劾武臣之驕縱而至朝廷之益尊為相諤諤而有

大臣節者張九齡也兼叔向之遺直子產之遺愛者魏
知古也器識沈邃有歲寒後凋之節者陸象先也振厲
名節臨事方嚴而面斥諂諛之臣者蕭復也以至張巡
之堅守睢陽南霽雲之斷指自誓李嗣業被堅數奮為
諸軍冠房琯之以天下為己任請自將平賊蕭華以魏
自守而不肯從漁陽之亂賈耽付節度於樊澤而不敢
稽天子之命袁履謙同杲卿以圖賊斬欽湊於外郵而
力為常山之守又皆其以忠勇而衛王室者也圖而像

之其可緩哉推其所自寔貞觀忠厚之意有以先之也

秦瓊傳貞觀十三年秦瓊改封胡國公

後四年詔司徒趙國公無忌

司空河間王孝恭

司空萊國公如晦

司空太子太師鄭國公徵

司空梁國公玄齡

開府儀同三司鄂國公敬德

特進衛國公靖

特進宋國公瑤

輔國大將軍褒國公志玄

輔國大將軍夔國公弘基

尚書左僕射蔣國公通

陝東道行臺右僕射鄆國公開山

荊州都督譙國公紹
荊州都督邳國公順德

洛州都督鄆國公亮
吏部尚書陳國公君集

左驍衛大將軍鄭國公公謹

左領衛大將軍虞國公知節

禮部尚書永興國公世南

戶部尚書渝國公政會 戶部尚書莒國公儉

兵部尚書英國公勣 并叔寶並圖形凌煙閣

高宗永徽六年遣使致祭名臣圖形凌煙閣者凡七人
徵士廉瑀志玄弘基世南叔寶皆始終著名者也

李博傳大中初又詔求 李峴 王珪 戴胄

馬周 褚遂良 韓瑗 郝處俊 婁師德

王及善 朱敬則 魏知古 陸象先 張九齡

裴寂

劉文靜

張柬之

袁恕已

崔元暉

桓彥範

劉幽求

郭元振

房琯

袁履謙

李嗣業

張巡

許遠

盧奕

南霽雲

蕭華

張鎬

李勉

張鎰

蕭復

柳渾

賈耽

馬燧

李澄

三十七人

畫像續圖凌煙閣云

宋朝官制

宋朝自太祖設官分職多襲五代之制雖稍有增損而

大體俱舊制也唐制省部寺監之官備員而已無所職掌別領內外任使而省部寺監別設主判官名惟以侍中中書令同中書門下平章事為宰相此尚循唐制也至乾德二年始置參知政事為宰相副貳

以薛居正呂餘慶為宰相所居省謂之中書門下國政所出也而兵政隸樞密院承五代之制故樞密有使副使知院同知簽書與中書號為二府焉

對持文武二柄故號曰二

尚書省置判尚書都省

只一員但掌百官赴省集議及大祀受誓戒之事

六部各有主判率以舉事待制館閣官領之吏部即審官東院掌尚書左選審官西院掌尚書右選吏部南曹掌侍郎左選三班院掌侍郎右選流內銓考功郎官之職也戶部即三司使尚書之任也

其官崇職重久次者為使稍輕則為權使資淺則為權發遣使公事

曰度支副使曰戶部副使曰鹽鐵副使皆侍郎之任也
別置子司判官度支戶部鹽鐵各有判官所掌即本曹
郎官之職也判胄案唐軍器監職也

掌造器械

判修造案唐工部將作少監職也

掌修造

判磨勘司唐比部職也

掌勾考

禮部有判部及判禮部貢院即尚書侍郎之任若兵部之事即歸樞密工部之事則歸三司此二部不設主判官多以他官兼之刑部則審刑院也

掌詳覆諸路奏案

翰林學士襲唐制以六員為額其帶知制誥則釐職事其別領省府職事則不帶知制誥年德俱重者為承旨知通進銀臺司兼門下封駁事即給事中 also 知制誥即中書舍人之職也

御史臺雖有大夫而不除以中丞為臺長諫官以別官兼領者即為知諫院同知諫院

資輕者為知院同知院兼掌博士之職

九寺則判太常寺禮院即卿之任也宗正則有判寺太僕職屬羣牧司則有制置使以樞密及學士領之大理則糾察京師刑獄是其職也鴻臚則歸於客省四方館光祿司農太府其職皆屬三司衛尉無所摠轄其職分為金吾衛仗司其環衛之任分為三衛皇城司矣故此

五寺別無置司并主判官秘書省郎昭文史館集賢謂之三館與秘閣隸本省有直館直院直閣校理館閣校勘謂之館職

初除於本省供職一年出補外任使

國子監有判監其資淺者為同知即祭酒司業之任而博士轉為直講將作少府軍器都水之職並屬於三司矣都水無常員一遇興役則遣官亦係三司等人職掌官外又有學士待制等員惟觀文殿大學士仁宗以賈

昌朝辭使相特建此職仍詔非曾任宰相不除觀文殿學士而下曰資政殿端明翰林侍讀侍講龍圖天章寶文學士三閣待制皆為侍從清望之選

並無職掌多帶職以領在內省府寺監在外藩方任使

自資政以上多以授二府自北宋朝舊官制如此文臣則兼帶階勳即自武騎尉至上柱國十二轉是也武臣則兼帶階勳憲御檢校官四色憲御自監察御史至

御史大夫號為憲銜檢校自國子祭酒至三公亦唐及
五代舊制也而宋朝遵之元豐初始命置局詳定官制
大槩本唐六典為法稍增損之設尚書省置令左右僕
射門下省置侍中中書省置令已上為丞相尚書有左
右丞門下中書各有侍郎樞密院有知有同知己上為
執政官尚書六部有尚書有侍郎有郎中有員外
惟吏戶刑各置四員以其劇曹也

左右司郎官通糾六部號都司專佐宰相理省事謂之

宰屬翰林學士有定員御史臺官如舊制而除知雜事及裏行之名門下後省置左散騎常侍中書後省置右散騎常侍而不除人給舍諫官左右史之屬

曰左右散騎曰給事中曰起居郎曰左右諫議大夫曰左右司諫曰左右正言是也

皆號為兩省官秘書省有監自監少而下曰丞郎校書正字著作又佐郎號館職罷直館院校理等員惟有修撰直秘閣號貼職而別領在外任使九寺四監為寺監

官國子祭酒而下有司業丞簿太學有博士正錄已上
為學官是謂職事官罷三司使副及諸生判官而其職
分隸諸省部寺監以太師太傅太保為三師太尉司徒
司空為三公皆論道之官無專領之職為宰相兼官以
開府儀同三司易節度使同中書門下平章事號為使
相以唐之散階易省部寺監官歸釐本職號階官為寄
祿官而食其俸以領內外任使削憲銜檢校留勳十二
轉此元豐新制官名即循唐舊典職掌亦倣周禮六官

之法也

黃元禮崇官制

初神宗喜觀六典一日諭王珪等倣唐六典修改官制然唐六典以中書造命行無法式事門下審覆行有法式事尚書省奉行而政柄盡歸於中書又分班奏事各行其職蔡確言於神宗不置三省長官以左僕射兼門下侍郎右僕射中書侍郎各主兩省事時王珪為左確為右獨專政柄而珪不預聞除吏之事後呂正獻乃請

三省同班奏事分班治事而元祐行之其後不能易也
正獻呂公著

流品有別則人安其分無幸進之心爵秩有章則名
器加重而天下知所趨向也

然元豐官制以唐六典為宗名實正矣

臺省寺監職掌之官

而寄祿之制混為一流無復差別當時群臣不能推原
祖宗制官之意者蓋祖宗官制所以甄別流品者至為

嚴密一官凡數等曰宰執侍從之選卿監館職之選出身人之選廕補人之選雜流之選各為一等有條不紊可謂盛矣不獨此也

張演論

宋朝之待武臣也厚其祿而薄其禮凡貴於正任重於管軍要在橫行近在承旨御帶寵在閣職設遥郡以賞勞績設使臣以別祿秩此武臣之名分也以節度使留後觀察防禦團練使刺史為正任以殿前馬步軍副都

指揮使三衙都虞候天武捧日龍武神衛四廂都指揮
使為管軍以內客省使客省引進四方館東西上閣門
使副為橫行以通事舍人閣門祇候為閣職以橫行使
及諸州防禦團練使刺史為遙郡以諸司使副內殿
承制崇班為大使臣供奉官侍禁殿直供奉職為小使
臣自遙郡而上本俸皆厚其使臣本祿雖稍薄而添支
給券皆優若朝謁御燕惟正任預焉蓋正任方號武臣
得與文臣分班也管軍臣僚號侍衛橫行大使臣皆為

祇應官爾此所謂薄其禮也三司使之職又有制之善者宋沿五代後唐之制置三司使以摠國計五代專以鹽鐵為理財之要在三司之首

應四方貢賦之入朝廷未嘗預焉一歸三司摠鹽鐵

鹽鐵今之金簿

度支

主用度

戶部

主版圖

號計省使位亞執政目為計相稱省主其恩數廩祿與參樞均若除翰林承旨及資政端明殿學士或官至尚書或久任權三司使者方正除之若待登柄用多先預焉鹽鐵度支戶部在唐五代皆專使額

皇朝方各設副使以三司使摠之故號三司鹽鐵副使其度支戶部亦如之位亞待制乃稱省副恩數視大卿監逐司各置判官二員號三司鹽鐵判官三司度支戶

部判官以佐副使

其資序視轉運使又有三司判官六員謂之子司

子司各主一司開圻司兼○覆衙司磨勘司兼憑由
胄案兼刑案修造案河渠案各號三司判官管○開
圻司或衙司公事之類以專職也內二員兼刑案推
治隱盜斷刑事通稱省事

又其資序視提刑乃通稱省別凡初除必任子司自子
司遷監鐵等判官判官而後副使蓋祖宗不容資淺新

進人廁列於其間也祖宗舊制遷除執政侍從必先歷錢穀有自三司度支副使擢起居舍人知制誥有先除權三司使而乃拜樞密可見祖宗之意也其所使掌之

財驅磨財計檢察憑由悉歸磨勘司

乃今之比部

造作軍器

則冑案主行之

今之庫部

土木之工則隸修造案

今之工部

河防

之役則河渠案行之

今之水部

且國家工役之費無出於三

事且所用為蠹耗之大者必命三司使摠之乃可節以制度也至王安石為相以周禮行新法故持冢宰邦計

之說謂宰相當主財計遂與三司分權凡賦稅常貢征
推之利方歸三司摘山煮海坑冶推貨戶絕沒納之財
悉歸朝廷其立法與常平免役坊場河渡禁軍闕之地
利之資皆號朝廷封樁又有歲科上供之數盡運入京
師別創庫以貯之三司不與焉於是祖宗處國計之良
法盡壞矣自元豐改官制戶部尚書全無計相之權職
在行朝廷之文移僅能經畫在京官吏諸軍俸祿而已
以此論之三司使之職不待改官制而失其權自熙寧


變更法度之時已壞矣

蔡允道官制論

三司使之名起於後唐明宗時宋朝因之既專掌利柄而天下之事應用財者亦多兼摠之以故事權最重幾與二府相抗嘉祐中京師大水始取三司之河渠按置都水監元豐官制復以三司曹按歸之軍器監修造案之事歸之將作監三監皆隸工部如此之類不一於是戶部掌版籍財用二事而已權任非復三司之比元祐

中蘓子由為戶部侍郎大以為不便建言祖宗參酌古今之宜建立三司所領天下事幾半非以私三司也事權不一則財利散雖欲求富其道無由因請都水監將作軍器監悉隸戶部凡三監有所為戶部定其事之可否裁其費之多少其工部任其工之良苦程其作之遲速朝廷以為然從之按唐貞元初度支使杜佑辭錢穀之任引李巽自代先是度支以制置措費漸權百司之職廣設員吏繁而難理佑始奏營繕歸之將作木炭歸

之司農染練歸之少府綱條頗整公議多之由是而言
計司兼領他職自唐已然不特出於祖宗之意子由所
懇懇而言之者皆佑之所釐正也豈時移事異利病固
不同耶佑之所請見於蘇冕會要新史載之不如是之
詳也



羣書考索後集卷二十一